

舊五代史卷九十九

宋司空同中書門下平章事薛居正等撰

高祖紀上

高祖睿文聖武昭肅孝皇帝姓劉氏諱暉本名知遠及卽位改今諱其先本沙陁部人也四代祖諱湍帝有天

下追尊爲明元皇帝廟號文祖陵曰懿陵

案五代會要湍爲東漢顯

宗第八子淮陽王昞之後

高祖母隴西李氏追謚明貞皇后曾祖諱

昂晉贈太保追尊爲恭僖皇帝廟號德祖陵曰沛陵

案五

代要會懿陵沛陵皆無陵所遙申朝拜

曾祖母虢國太夫人楊氏追謚恭

惠皇后祖諱僖晉贈太傅追尊爲昭獻皇帝廟號翼祖



陵曰威陵祖母魯國太夫人李氏追諡爲昭穆皇后皇
考諱珣事後唐武皇帝爲列校晉贈太師追諡爲章聖
皇帝廟號顯祖陵曰肅陵皇妣吳國太夫人安氏追諡
章懿皇后后以唐乾寧二年歲在乙卯二月四日生帝
於太原帝弱不好弄嚴重寡言及長面紫色目睛多白
初事唐明宗列於麾下明宗與梁人對柵於德勝時晉
高祖爲梁人所襲馬甲連革斷帝輟騎以授之取斷革
者自跨之徐殿其後晉高祖感而壯之明宗踐阼晉高
祖爲北京留守以帝前有護援之力奏移麾下署爲牙
門都校應順初晉高祖鎮常山唐明宗召赴闕會閔帝

出奔與晉高祖相遇於途遂俱入衛州泊於郵舍閔帝左右謀害晉高祖帝密遣御土石敢袖鎚立於晉高祖後及有變敢擁晉高祖入一室以巨木塞門敢尋死焉

帝率眾盡殺閔帝左右遂免晉高祖於難

通鑑攷異引漢高祖實錄

云是夜偵知少帝伏甲欲與從臣謀害晉高祖詐屏人對語方坐庭廡帝密遣御土石敢袖鎚立于後俄頃伏甲者起敢有勇力擁晉高祖入一室以巨木塞門敢力當其鋒死之帝解佩刀遇夜晦以在地葦炬未燃者奮擊之眾謂短兵也遂散走帝乃匿身長垣下聞帝親將李洪信謂人曰石太尉死矣帝隔垣呼洪信曰太尉無恙乃踰垣出就洪信兵共護晉高祖殺建謀者以少主授王宏贇清泰元年晉高祖復

鎮河東三年夏移鎮汶陽帝勸晉高祖舉義贊成密計經綸之始中外賴之晉高祖以帝爲北京馬步軍都指

揮使及契丹以全軍赴難大破張敬達之眾於晉陽城下有降軍千餘人晉高祖將置之於親衛帝盡殺之晉國初建加檢校司空充侍衛馬步都指揮使權點檢隨駕六軍諸衛事尋改陝州節度使充侍衛親軍馬步都虞候契丹主送晉高祖至上黨指帝謂高祖曰此都軍甚操刺無大故不可棄之晉高祖入洛委帝巡警都邑肅然無敢犯令天福二年夏四月加檢校太保八月改許州節度使典軍如故三年夏四月加檢校太傅冬十月授侍衛親軍馬步軍都指揮使十一月移授宋州加檢校太尉十二月加同平章事時帝與杜重威同制加

恩帝憤然不樂懇讓不受杜門不出者數日

通鑑知遠自謂有佐

命功重威起于外戚無大功恥與之同制制下數日杜門四表辭不受

晉高祖怒召宰相

趙瑩等議落帝兵權任歸私第瑩等以爲不可乃遣端

明殿學士和凝就第宣諭帝乃承命五年三月改鄴都

留守兼侍衛親軍馬步軍都指揮使九月奉詔赴闕晉

高祖幸其第六年七月授北京留守河東節度使七年

正月加侍中時天下大蝗惟不入河東界六月晉高祖

崩於鄴宮少帝卽位加帝檢校太師八年三月進位中

書令開運元年正月契丹南下契丹主以大軍直抵瀘

州遣蕃將偉王率兵入鴈門朝廷以帝爲幽州道行營

招討使帝大破偉王於忻口尋奉詔起兵至土門軍至
樂平會契丹退乃還三月封太原王七月兼北面行營
都統二年四月封北平王三年五月加守太尉是月帝
誅吐渾白承福等五族凡四百人以別部王義宗統其
餘眾九月案以下疑有脫文犯塞帝親率牙兵至朔州南陽武
谷大破之東都事畧郭進傳契丹屠安陽高祖遣進拒戰契丹敗走以功除刺史十一月
契丹主率蕃漢大軍由易定抵鎮州杜重威等駐軍於
中渡橋以禦之十二月十日杜重威等以全軍降於契
丹十七日相州節度使張彥澤受契丹命陷京城遷少
帝於開封府帝聞之大駭分兵守境以備寇患天福十

二年春正月丁亥朔契丹主入東京癸巳晉少帝蒙塵於封禪寺癸卯少帝北遷二月丁巳朔契丹主具漢法服御崇元殿受朝制改晉國爲大遼國大赦天下號會同十年是月帝遣牙將王峻奉表於契丹契丹主賜詔褒美呼帝爲兒又賜木柅一蕃法貴重大臣方得此賜亦猶漢儀賜几杖之比也王峻持柅而歸契丹望之皆避路及峻至太原帝知契丹政亂乃議建號焉是月秦州節度使何建以其地入於蜀戊辰河東行軍司馬張彥威與文武將吏等以中原無主帝威望日隆羣情所屬上牋勸進帝謙讓不允自是羣官三上牋諸軍將吏

緇黃耆耄相次迫請教答允之庚午陝府屯駐奉國指揮使趙暉侯章都頭王晏殺契丹監軍及副使劉愿暉自稱留後契丹因授暉陝州兵馬留後侯章爲本州馬步軍都指揮使王晏爲副都指揮使暉等不受僞命

宋史

王晏傳開運末與本軍都校趙暉忠衛都校侯章等戍陝州會契丹至汴遣其將劉愿據陝恣行暴虐晏與暉等謀曰今契丹南侵天下洶洶英雄豪傑固當乘時自奮且聞太原劉公威德遠被人心歸服若殺愿送欸河東爲天下唱首則取富貴如反掌耳暉等然之晏乃率敢死士數人夜踰城入府署劫庫兵給其徒遲明斬愿首懸府門外眾請暉爲帥章爲本城副指揮使內

辛未

帝於太原宮受冊卽皇帝位制改晉開運四年爲天福

十二年

契丹國志云漢主仍稱天福年號曰子未忍忘晉也

甲戌帝以晉帝舉族

北遷憤惋久之是日率親兵趨土門路邀迎晉帝至壽陽聞其已過乃還契丹聞帝建號僞制削奪帝官爵以通事耿崇美爲潞州節度使高唐英爲相州節度使崔廷勲爲河陽節度使以扼要害之地丁丑磁州賊帥梁暉據相州已卯帝遣都將史弘肇率兵討代州平之初代州刺史王暉叛歸契丹弘肇一鼓而拔之斬暉以徇庚辰權晉州兵馬留後張晏洪奏軍亂殺知州副使駱從朗及括錢使諫議大夫趙熙以城歸順時晉州留後劉在明赴東京朝於契丹從朗知軍州事帝方遣使張晏洪辛處明等告諭登極從朗囚之本城大將藥可傳

殺從朗於理所州民相率害趙熙三軍請晏洪爲留後
處明爲都監辛巳權陝州留後趙暉權潞州留後王守
恩並上表歸順癸未澶州賊帥王瓊與其眾斷本州浮
橋瓊敗死之時契丹以族人朗悟舊作郎五今改正爲澶州節
度使契丹性貪虐吏民苦之瓊爲水運什長乃構夏津
賊帥張乙得千餘人沿河而上中夜竊發自南城殺守
將絕浮航入北城朗悟據牙城以拒之數日會契丹救
至瓊敗死焉契丹主聞其變也懼甚由是大河之南無
久留之意尋遣天雄軍節度使杜重威歸鎮三月丙戌
朔詔河東管內自前稅外雜色徵配一切除放是日契

丹主坐崇元殿行入閭之禮契丹主以舅蕭翰爲宣武
軍節度使辛卯權延州留後高允權遣判官李彬奏本
道節度使周密爲三軍所逐以允權知留後事上表歸
順未幾帝召密赴行在壬辰丹州都指揮使高彥珣殺
僞命刺史據城歸命壬寅契丹主發自東京還本國

案遼

史太宗紀作四月丙辰朔發自汴州與薛
史異歐陽史及通鑑俱從薛史作壬寅

是日宿於赤

岡至晡有大聲如雷起於敵帳之下契丹自黎陽濟河

遂趨相州

案通鑑作丙午契丹自白馬渡河
遼史作乙丑濟黎陽渡與通鑑異

庚戌帝以

北京馬步軍都指揮使泗州防禦使檢校太保劉崇爲
太原尹檢校太尉以北京馬步軍都虞候郭從義爲鄭

州防禦使檢校太保以北京興捷左廂都指揮使李洪
信爲陳州刺史檢校司徒以興捷右廂都指揮使尙洪
遷爲單州刺史檢校司徒以北京武節左廂都指揮使
蓋萬爲蔡州刺史以武節右廂都指揮使周暉爲濮州
刺史以保寧都指揮使朱奉千爲隨州刺史辛亥吐渾
節度使王義宗加檢校太尉以前忻州刺史秦習爲耀
州團練使癸丑以北京副留守檢校司徒白文珂爲河
中節度使檢校太尉夏四月己未以北京馬軍都指揮
使集州刺史劉信爲滑州節度使充侍衛馬軍都指揮
檢校太傅以北京隨使右都押衙楊邠爲權樞密使檢

校太保以北京武節都指揮使雷州刺史史弘肇爲許
州節度使充侍衛步軍都指揮使檢校太傅以北京牢
城都指揮壁州刺史常思爲鄧州節度使檢校太傅兼
權北京馬步軍都指揮使三城巡檢使以河東行軍司
馬張彥威爲同州節度使檢校太保以蕃漢兵馬都孔
目官郭威爲權樞密使檢校司徒以河東左都押衙扈
彥珂爲宣徽南院使檢校司徒以右都押衙王浩爲宣
徽北院使檢校司徒以兩使都孔目官王章爲權三司
使檢校太保是日契丹王取相州殺留後梁暉宋史李穀傳潛
遣河朔酋豪梁暉入據安陽契丹主患之卽謀北旋暉
會有告契丹以城中虛弱者契丹遣攻安陽陷其城暉

磁州滏陽人少爲盜會契丹入汴暉收集徒黨先入磁州無所侵犯遣使送款於帝暉偵知相州頗集兵仗且無守備遂於三月二十一日夜與其徒踰垣而入殺契丹數十人奪器甲數萬計遂據其城契丹主先遣僞命相州節度使高唐英率兵討之未幾契丹主至城下是月四日攻拔之遂屠其城翌日契丹主北去命高唐英鎮之唐英閱城遺民得男女七百人而已乾祐中王繼弘鎮相州奏於城中得髑髏十餘萬殺人之數從可知也庚申以石州刺史易全章爲洛州團練使以前遼州刺史安眞爲宿州團練使以嵐州刺史孟行超爲潁州

團練使以汾州刺史武彥弘爲曹州防禦使以前憲州
刺史慕容信爲齊州防禦使以遼州防禦薛瓊爲亳州
防禦使以沁州刺史李漢韜爲汝州防禦使癸亥冊魏
國夫人李氏爲皇后甲子以皇長子承訓爲左衛上將
軍第二子承祐爲左衛大將軍第三子承勲爲右衛大
將軍皇女彭城郡君宋氏封永寧公主皇姪承贊爲右
衛上將軍以河東節度判官蘇逢吉爲中書侍郎同平
章事集賢殿大學士以河東觀察判官蘇禹珪爲中書
侍郎同平章事升府州爲節鎮加永安軍額以振武節
度使府州團練使折從阮爲永安軍節度使行府州刺

史檢校太尉以北京隨使左都押衙劉銖爲河陽節度使以河東支使韓祚爲左諫議大夫充樞密直學士乙丑遣史弘肇率兵一萬人趨潞州丙寅以權知潞州軍州事左驍衛大將軍王守恩爲潞州節度使檢校太保以權點檢延州軍州事高允權爲延州節度使檢校太保以岢嵐軍使鄭謙爲忻州刺史遙領應州節度使充忻代二州義軍都部署丁卯以河東都巡綽驛沿河巡檢使閻萬進爲嵐州刺史領朔州節度使充嵐憲二州義軍都制置戊辰權河陽留後武行德以城來歸初契丹主將發東京舩載武庫兵仗自汴浮河欲置之於北

地遣奉國都虞候武行德部送與軍士千餘人并家屬俱行至河陰軍亂奪兵仗殺契丹監吏眾推行德爲帥

與河陰屯駐軍士合乃自汜水抵河陽河陽僞命節度

使崔廷勲率兵拒之兵敗行德等追躡之廷勲棄城而

遁行德因據其城

隆平集武行德傳行德陷于契丹僞請自効因遣送將校數十人護所取

尙方鎧甲還契丹至河陰行德謂眾曰我與若等能爲邊地鬼耶眾素伏其威名皆曰惟命遂攻孟州走其節度使崔廷勲悉以府庫分諸校而權領州事集又云遣其弟行友詣太原勸進僞命西京留守

劉晞棄洛城南走許州遂奔東京洛京巡檢使方太自

署知留守事未幾太爲武行德所害是月蕃將耿崇美

屯澤州史弘肇遣先鋒將馬誨率兵擊之崇美退保懷

州崔廷勲以契丹眾攻武行德於河陽行德出戰爲廷勲所敗汴州蕭翰遣蕃將高牟翰將兵援送劉晞復歸於洛牟翰至殺前澶州節度使潘環於洛陽辛未以河陽都部署武行德爲河陽節度使檢校太尉充一行馬部軍都部署甲戌潞州節度使王守恩加檢校太尉以前棣州刺史慕容彥超爲澶州節度使檢校太保丙子契丹主耶律德光卒於鎮之樂城

案遼史太宗紀四月丁丑崩於樂城與薛

史異歐陽史及通鑑俱從薛史作丙子

趙延壽於鎮州自稱權知國事辛

巳陝州節度使趙暉加檢校太尉華州節度使兼陝州

馬步軍都指揮使侯章加檢校太傅以陝府馬步軍副

都指揮使兼絳州防禦使王晏爲晉州節度使檢校太
傅以丹州都指揮使權知軍州事高彥珣爲丹州刺史
永樂大典卷一萬六千九十八
隆平集王晏傳云
漢祖威名未振而晏等歸之甚喜卽授以節度使

舊五代史卷九十九終

舊五代史卷九十九攷證

漢高祖紀上帝大破偉王于忻口 案漢祖破偉王是

書作開運元年正月歐陽史漢本紀作三年五月晉
本紀又載開運元年正月辛丑劉知遠及契丹偉王
戰于秀容敗之兩紀年月互異應以是書爲據

三年五月加守太尉是月帝誅吐渾白承福等五族

案歐陽史作八月殺吐渾白承福等族

殺契丹數十人 案契丹國志作殺遼兵數百

丙子契丹主耶律德光卒于鎮之樂城 案遼史太宗

紀四月丁丑崩于樂城與是書異歐陽史及通鑑俱

從是書作丙子

舊五代史卷九十九攷證

舊五代史卷一百

宋司空同中書門下平章事薛居正等撰

高祖紀下

漢書二

天福十二年夏五月乙酉朔契丹所署大丞相政事令
東京留守燕王趙延壽爲永康王鄂約舊作兀欲今改正所繫

旣而鄂約召蕃漢臣寮於鎮州牙署戎王遺詔命鄂約
嗣位於是發哀成服辛卯詔取五月十二日車駕南幸
甲午以判太原府事劉崇爲北京留守命皇子承訓武
德使李暉大內巡檢丙申帝發河東取陰地關路幸東
京時星官言太歲在午不利南巡故路出陰地丁酉史

弘肇奏澤州刺史翟令奇以郡來降

宋史李萬超傳史宏肇路徑澤州刺

史翟令奇堅壁拒命萬超馳至城下諭之曰今契丹北遁天下無主并州劉公仗大義定中土所向風靡後服者族早盍圖之令奇乃開門迎納宏肇卽留萬超權州事

是日契丹所署汴州節度

使蕭翰迎郇國公李從益至東京請從益知南朝軍國事已亥蕭翰發離東京北去乙巳契丹永康王鄂約自鎮州還蕃行次定州以定州節度副使耶律忠爲定州節度使孫方簡爲雲州節度使方簡不受命遂歸狼山戊申車駕至絳州本州刺史李從朗以郡降初契丹遣偏校成霸卿曹可璠等守其郡帝建義之始不時歸命及車駕至帝耀兵於城下不令攻擊從朗等遂降六月

乙卯契丹河中節度使趙贊起復河中節度使

按通鑑起復趙

匡贊在七月甲午以後與薛史異又匡贊薛史作趙贊考贊卽延壽之子仕宋歷廬延邠鄜四州蓋入宋後避諱去匡字也

今仍其舊

是日契丹右僕射兼中書侍郎平章事張

礪卒於鎮州丙辰車駕至洛兩京文武百寮自新安相

次逢迎郇國公李從益唐明宗淑妃王氏皆賜死於東

京甲子車駕至東京丙寅以漢州就糧歸捷指揮使張

建爲濮州刺史以金州守禦指揮使康彥環爲金州防

禦使建雄彥環皆因亂害本州刺史自知州事故有是

命以北京知進奏王從璋爲內客省使戊辰制大赦天

下應天福十二年六月十五日昧爽以前天下見禁罪

人已結正未結正已發覺未發覺除十惡五逆外罪無輕重咸赦除之諸州去年殘稅並放東西京一百里外放今年夏稅一百里內及京城今年屋稅並放一半契丹所授職任不宜改更諸貶降官未量移與量移已量移者與敘錄徒流人並放還應係欠省省錢家業抵當外並放宜以國號爲大漢年號依舊稱天福云

案歐陽史六月

戊辰改國號漢是戊辰以前猶未改國號也遼史太宗紀二月辛未河南節度使北平王劉知遠自立爲帝國號漢蓋因其自立而

牽連書之疑未詳考已已詔青州襄州安州復爲節鎮

曹陳二州依舊爲郡王申北京留守劉崇加同平章事以中書舍人劉繼儒爲宗正卿翰林學士承旨尙書兵

部侍郎張允落職守本官以尙書左丞張昭爲吏部侍郎以左散騎常侍邊歸儼爲禮部侍郎以左散騎常侍王仁裕爲戶部侍郎充翰林學士承旨以右諫議大夫張沆爲左散騎常侍充翰林學士以戶部侍郎李式爲光祿卿以翰林學士尙書禮部侍郎邊光範爲衛尉卿甲戌詔文武臣僚每遇內殿起居輪次上封事丁丑以湖南節度使馬希範卒輟視朝三日是月契丹所命相州節度使高唐英爲屯駐指揮使王繼弘楚暉所殺秋七月己丑以御史中丞趙上交爲太僕卿以戶部侍郎邊蔚爲御史中丞甲午武安軍節度副使水陸諸軍副

都指揮使判內外諸司江南西道觀察等使檢校太尉
馬希廣可檢校太師兼中書令行潭州大都督天策上
將軍充武安軍節度湖南管内觀察使江南諸道都統
封楚王丙申以鄴都留守天雄軍節度使檢校太師守
太傅兼中書令衛國公杜重威爲宋州節度使加守太
尉以宋州節度使檢校太師兼中書令高行周爲鄴都
留守加守太傅以鄆州節度使檢校太師兼侍中李守
貞爲河中節度使加兼中書令以河中節度使檢校太
尉趙贊爲晉昌軍節度使宋史趙贊傳贊懼漢疑已潛遣親吏趙僊奉表歸蜀判官
李恕者趙延壽賓佐深所委賴至家事亦參之及贊出鎮從爲上介至是恕語贊曰燕王入遼非所願也漢方

建國必務懷柔公若泥首歸朝必保富貴狼狽入蜀理難萬全儻若不容後悔無及公能聽納請先入朝爲公申理贊卽遣恕詣闕漢祖見恕問贊何以附蜀恕曰贊家在燕薊身受契丹之命自懷憂恐謂陛下終不能容招引西軍蓋圖苟免臣意國家甫定務安臣民所以令臣乞哀求覲漢祖曰贊之父子亦吾人也事契丹出于不幸今聞延壽落于陷穽吾忍不容贊耶恕以晉昌軍未還贊已離鎮入朝卽命爲左驍衛將軍

節度使張彥超爲鄜州節度使加檢校太師庚子以徐州節度使檢校太師同平章事岐國公符彥卿爲兗州節度使加兼侍中以鄧州節度使檢校太師王周爲徐州節度使加同平章事以許州節度使檢校太保劉重進爲鄧州節度使加檢校太傅以兗州節度使檢校太師兼侍中安審琦爲襄州節度使檢校太師莒國公李

從敏爲西京留守加同平章事以鳳翔節度使檢校太師同平章事侯益依前鳳翔節度使加兼侍中辛丑故守司空兼門下侍郎平章事譙國公劉昫贈太保甲辰華州節度使侯章同州節度使張彥威涇州節度使史威並加檢校太尉以晉昌軍節度使檢校太保劉錫爲青州節度使加檢校太尉同平章事以河中節度使檢校太尉白文珂爲鄆州節度使加同平章事以青州節度使楊承信爲安州節度使加檢校太傅滑州節度使兼侍衛馬軍都指揮使劉信許州節度使兼侍衛步軍都指揮使史弘肇並加檢校太尉庚戌以司天監任廷浩

爲殿中監以司天少監杜昇爲司天監是月契丹永康

王鄂約囚祖母舒嚕

舊作述律
今改正

氏於木葉山閏月辛酉

以左衛上將軍皇甫立爲太子太師致仕乙丑禁造契

丹樣鞍轡器械服裝故開封尹桑維翰贈尙書令故西

京留守景廷廣贈中書令以前衛尉卿薛仁讓爲司農

卿丙寅唐故樞密使郭崇韜贈中書令故河中節度使

安重誨贈尙書令故華州節度使毛璋贈侍中故汴州

節度使朱守殷贈中書令丁卯故青州節度楊光遠贈

尙書令追封齊王仍令所司追謚立碑唐故河中節度

使西平王朱友謙追封魏王故樞密使馮贇贈中書令

故河陽節度使判六軍康義誠贈中書令故西京留守
京兆尹王思同故邠州節度使藥彥稠故襄州節度使
安重進故鎮州節度使安重榮並贈侍中庚午以前延
州留後薛可言爲宣徽北院使以監察御史王度爲樞
密直學士新授宋州節度使杜重威據鄴都叛詔削奪
重威官爵貶爲庶人以高行周爲行營都部署率兵進
討辛未以權樞密使楊邠爲樞密使加檢校太傅以權
樞密副使郭威爲副樞密使加檢校太保以權三司使
王章爲三司使加檢校太傅壬申故晉昌軍節度使趙
在禮贈中書令故曹州節度使石贇贈侍中故滑州節

度使皇甫遇贈中書令故同州節度使劉繼勳故貝州
節度使梁漢璋皆贈太尉故宣徽使孟承誨贈太保丁
丑有彗出於張旬日而滅己卯陝州節度使趙暉加階
爵晉州節度使王晏加檢校太尉河陽節度使武行德
加階爵延州節度使高允權加檢校太尉鄧州節度使
常思加檢校太尉移鎮潞州庚辰追尊六廟以太祖高
皇帝世祖光武皇帝爲不祧之廟高曾以下四廟追尊
謚號已載於前矣是日權太常卿張昭上六廟樂章舞
名太祖高皇帝室酌獻請依舊奏武德之舞世祖光武
皇帝室酌獻請依舊奏大武之舞文祖明元皇帝室酌

獻請奏靈長之舞德祖恭僖皇帝室酌獻請奏積善之
舞翼祖昭獻皇帝室酌獻請奏顯仁之舞顯祖章聖皇
帝室酌獻請奏章慶之舞其六廟歌詞文多不錄八月
壬午朔鎮州駐屯護聖左廂都指揮使白再榮等逐契
丹所命節度使滿達勒舊作麻答今改正復其城滿達勒與河
陽節度使崔廷勲洛京留守劉晞並奔定州馳驛以聞
庚寅以洺州團練使薛懷讓爲邢州節度使辛卯詔恆
州復爲鎮州順國軍復爲成德軍乙未以護聖左廂都
指揮使恩州團練使白再榮爲鎮州留後丙申詔天下
凡關賊盜不計贓物多少案驗不虛並處死以兩浙節

度使守太師兼中書令吳越國王錢弘佐薨廢朝三日
丙午以吐渾府節度使檢校太尉王義宗爲沁州刺史
依前吐渾節度使已酉以刑部尙書竇貞固爲吏部尙
書是日薛懷讓奏收復邢州殺僞命節度副使知州事
劉鐸初懷讓爲洺州防禦使契丹滿達勒發健步督洺
州糧運懷讓殺之以聞帝遣郭從義與懷讓攻取邢州
蕃將楊衮來援鐸懷讓拒之不勝退保洺州敵騎掠其
部民大被其苦會鎮州逐滿達勒楊衮收兵而退鐸乃
上表請命懷讓乘其無備遣人紿鐸云奉詔襲契丹請
置頓於郡鐸開門迎之卽爲懷讓所害時人冤之鐸初

受契丹命爲邢州都指揮使及永康王以高奉明爲節度使滿達勒署鐸爲邢州副使兼都指揮使帝至東京奉明歸鎮州令鐸知邢州事至是遇害庚戌文武百寮上表請以二月四日降誕日爲聖壽節從之前晉昌軍節度副使李肅加左驍衛上將軍致仕是月遣使諸道和市戰馬九月甲子宰臣蘇逢吉兼戶部尙書蘇禹珪兼刑部尙書丁卯以吏部侍郎權判太常卿事張昭爲太常卿戊辰故易州刺史郭璘贈太傅甲戌宰臣蘇逢吉加左僕射監修國史蘇禹珪加右僕射集賢殿大學士以吏部尙書竇貞固爲守司空兼門下侍郎平章事

弘文館大學士

宋史寶貞固傳初帝與貞固同事晉祖甚相得時蘇逢吉蘇禹珪自霸府僚佐

驟居相位思得舊臣冠首以貞固持重寡言有時望乃拜司空門下侍郎平章事

以翰林學士

行中書舍人李濤爲中書侍郎兼戶部尚書平章事

宋史

李濤傳杜重威據鄴叛高祖命高行周慕容彥超討之二帥不協濤密疏親征高祖覽奏以濤堪任宰輔卽拜中書侍郎兼戶部侍郎平章事是日權太常卿張昭上疏奏改一代樂

名戊寅詔以杜重威叛命取今月二十九日暫幸澶魏

已卯以前樞密使李崧爲太子太傅以前左僕射和凝

爲太子太保庚辰車駕發京師冬十月癸未以太子太

保李鏐爲司徒以太子太傅盧文紀爲太子太師以前

磁州刺史李穀爲左散騎常侍

宋史李穀傳舊制罷外郡歸本官至是進秩獎

也之甲申車駕次韋城詔河北諸州見禁罪人自十月五日昧爽以前常赦所不原者咸赦除之王辰日有黑子如雞卵丙申以相州留後王繼弘爲相州節度使加檢校太傅至鄴都城下丙午詔都部署高行周督眾攻城帝登高阜以觀之時眾議未欲攻擊副部署慕容彥超堅請攻之是日王師傷夷者萬餘人不克而退十一月壬子雨木冰癸丑日南至從官稱賀於行宮己未湖南奏荆南節度使高從誨叛辛酉雨木冰壬申杜重威上表請命癸酉雨木冰丁丑杜重威素服出降待罪於宮門詔釋其罪鄴都留守天雄軍節度使高行周加守太尉

封臨清王以杜重威爲檢校太師守太傅兼中書令楚國公已卯以許州節度使兼侍衛步軍都指揮使史弘肇爲宋州節度使同平章事充侍衛親軍馬步軍都指揮使以滑州節度使兼侍衛馬軍都指揮使劉信爲許州節度使同平章事充侍衛親軍馬步軍副都指揮使以澶州節度使慕容彥超爲鄆州節度使同平章事以前定州節度使李殷爲貝州節度使以鄭州防禦使郭從義爲澶州節度使十二月辛巳朔以護聖左廂都指揮使岳州防禦使李洪信爲遂州節度使充侍衛步軍都指揮使以護聖右廂都指揮使永州防禦使尙洪遷

爲夔州節度使充侍衛步軍都指揮使丙戌車駕發鄴都歸京癸巳至自鄴都甲午以皇子開封尹承訓薨廢朝三日追封魏王丁酉帝舉哀於太平宮庚子司徒李璘薨辛丑以前鄜州節度使郭謹爲滑州節度使加檢校太尉戊申宿州奏部民餓死者八百六十有七人乾祐元年正月辛亥朔帝不受朝賀乙卯制大赦天下改天福十三年爲乾祐元年自正月五日昧爽已前犯罪人除十惡五逆外罪無輕重咸赦除之己未改御名爲暉辛酉詔諸道行軍副使兩使判官並不得奏薦帶使相節度使許奏掌書記支使節度推官不帶使相節度使

只許奏掌書記節度推官其防禦團練判官軍事判官等聽奏所薦州縣官帶使相節度使許薦三人不帶使相二人防禦團練刺史一人云以前鄧州節度使燕國公馮道爲守太師進封齊國公甲子帝不豫庚午以前宗正卿石光贊爲太子賓客以太僕卿趙上交爲秘書監丁丑故尙書左丞韓祚贈司徒二十七日丁丑帝崩於萬歲殿時年五十四秘不發喪庚辰太傅杜重威伏誅契丹國志云漢主召蘇逢吉楊邠史宏肇入受顧命曰承祐幼弱後事託在卿輩又曰善防杜重威是日殂逢吉等秘不發喪下詔稱重威父子因朕小疾謗議搖眾皆斬之磔死于市市人爭啖其肉二月辛巳朔內降遺制皇子周王承祐可於柩前卽皇帝位是

日發哀其年三月太常卿張昭上諡曰睿文聖武昭肅

孝皇帝廟號高祖十一月壬申葬於睿陵宰臣蘇禹珪

撰謚册哀册文云

永樂大典卷一萬六千九十八五
代史補高祖嘗在晉祖麾下晉祖既

起太原因高祖遂有天下先是豫章有僧號上藍者精
於術數自唐末著讖云石榴花發石榴開議者以石榴
則晉漢之謂也再言石榴
者明享祚俱不過二世矣

史臣曰在昔皇天降禍諸夏無君漢高祖肇起并汾過

臨汴洛乘虛而取神器因亂而有帝圖雖曰人謀諒由

天啟然帝昔蒞戎藩素虧物望洎登宸極未厭人心徒

矜拯溺之功莫契來蘇之望良以急於止殺不暇崇仁

燕薊降師既連營而受戮鄴臺叛帥因閉壘以偷生蓋

撫御以乖方俾征伐之不息及回鑾輅尋墮烏號故雖
有應運之名而未覩爲君之德也

永樂大典卷一
萬六千九十八

舊五代史卷一百終

舊五代史卷一百攷證

漢高祖紀下矯其主遺詔命烏裕嗣位 案遼史世宗紀作四月戊寅卽皇帝位歐陽史通鑑契丹國志俱從是書作五月與遼史異

乙巳契丹永康王烏裕自鎮州還蕃行次定州 案遼史作甲申次定州與是書異

契丹河中節度使趙贊起復河中節度使 案遼史世宗紀天祿二年十月壬午南京留守魏王趙延壽薨攷遼天祿二年卽漢乾祐二年此時天福十二年延壽尙未死也此必因建壽爲永康王所鎖而漢人傳

其已死遂起復其子贊以絕其北向之心耳

新授宋州節度使杜重威據鄴都叛詔削奪重威官爵
貶爲庶人 案通鑑杜重威之叛在七月至閏月庚
午乃削奪官爵五代春秋歐陽史作閏七月杜重威
拒命與通鑑異

懷讓遣人給鐸云奉詔襲契丹請置頓于郡 案宋史
薛懷讓傳懷讓遣人給鐸云我奉詔爲邢州帥據是
書則懷讓實給鐸奉詔襲契丹以庚寅授邢州節度
使非給之也特託言置頓于郡耳

丙申至鄴都城下 案通鑑作戊戌至鄴都城下與是

書異

甲午以皇子開封尹承訓薨廢朝三日追封魏王 案
通鑑辛卯皇子開封尹承訓卒乙未追立爲魏王與
是書紀日互異

烏裕舊作兀欲今改 舒嚕舊作述律今改 滿達勒
舊作麻答今改

舊五代史卷一百攷證

舊五代史卷一百一

宋司空同中書門下平章事薛居正等撰

隱帝紀上

漢書三

隱皇帝諱承祐高祖第二子也母曰李太后以唐長興二年歲在辛卯三月七日生帝于鄴都之舊第高祖鎮太原署節院使累官至檢校尚書右僕射國初授左衛大將軍檢校司空遷大內都點檢檢校太保乾祐元年正月二十七日高祖崩秘不發喪二月辛巳授特進檢校太尉同平章事封周王宣制畢有頃召文武百僚赴萬歲殿內降大行皇帝遺制云周王承祐可于樞前卽

皇帝位服紀日月一依舊制是日內外發哀成服初高祖欲改年號中書門下進擬乾和二字高祖改爲乾祐至是與御名相符甲申羣臣上表請聽政詔荅不允凡四上表從之丁亥帝于萬歲殿門東廡下見羣臣尊母后爲皇太后己丑徐州節度使王周卒庚寅以前晉州留後劉在明爲鎮州留後幽州馬步軍都部署加檢校太尉是日工部尙書龍敏卒壬辰右衛大將軍王景崇奏于大散關大敗蜀軍俘斬三千人初契丹犯京師侯益趙贊皆受其命節度岐蒲聞高祖入洛頗懷反仄朝廷移贊于京兆侯益與贊皆求援于蜀蜀遣何建率軍

出大散關以應之至是景崇糾合岐雍邠涇之師以破之癸巳制大赦天下自乾祐元年二月十三日昧爽已前所犯罪人已結正未結正已發覺未發覺常赦所不原者咸赦除之中外文武臣僚並與加恩馬步將士各賜優給唐晉兩朝求訪子孫立爲二王後云丙午鳳翔巡檢使王景崇遣人送所獲僞蜀將校軍士四百三十人至闕下詔釋之仍各賜衣服以兵部侍郎張允爲吏部侍郎以工部侍郎司徒詡爲禮部侍郎丁未以光祿卿李式爲尙書右丞以禮部侍郎邊歸讜爲刑部侍郎以刑部侍郎盧價爲兵部侍郎三月甲寅帝始御廣

政殿羣臣起居殿中少監胡崧上言請禁斫伐桑棗爲薪城門所由專加捉搦從之丙辰鄴都留守太尉中書令臨清王高行周進封鄴王北京留守檢校太尉同平章事劉崇加宋州節度使兼侍衛親軍馬步軍都指揮使檢校太尉同平章事史弘肇並加檢校太師兼侍中前邢州節度使安叔千以太子太師致仕戊午以右諫議大夫于德辰爲兵部侍郎庚申河中節度使檢校太師兼中書令李守貞加守太傅進封魯國公襄州節度使檢校太師兼中書令虢國公安審琦加守太保進封齊國公兗州節度使檢校太師兼侍中岐國公符彥卿

加兼中書令進封魏國公許州節度兼侍衛親軍副都
指揮使檢校太尉同平章事劉信加檢校太師壬戌以
宰臣竇貞固爲山陵使吏部侍郎段希堯爲副使太常
卿張昭爲禮儀使兵部侍郎盧價爲鹵簿使御史中丞
邊蔚爲儀仗使丙寅以前鳳翔節度使兼西南面兵馬

都署檢校太師兼侍中侯益爲開封尹加兼中書令

宋史

侯益傳益率數十騎奔入朝隱帝遣侍臣問益連結蜀
軍之由益對曰臣欲誘之出關掩殺之耳隱帝笑之益
厚賂史弘肇輩言王景崇之橫恣諸權貴深庇護之乃授以開封尹兼中書令

西京留守檢校

太師平章事莒國公李從敏夏州節度使檢校太師同
平章事李彝殷並加兼侍中青州節度使檢校太尉同

平章事劉銖鄆州節度使檢校太尉同平章事慕容彥超並加檢校太師詔改廣晉府爲大名府晉昌軍爲永興軍戊辰靈州節度使檢校太師同平章事馮暉加兼侍中河陽節度使武行德滄州節度使王景華州節度使侯章晉州節度使王晏並依前檢校太尉加同平章事庚午涇州節度使史懿潞州節度使常思同州節度使張彥威延州節度使高允權並依前檢校太尉加同平章事澶州節度使郭從義邢州節度使薛懷讓並自檢校太傅加檢校太尉以前奉國右廂都指揮使王饒爲鄜州留後甲戌以邠州節度使檢校太尉同平章事

王守恩爲永興軍節度使加檢校太師以滑州節度使
檢校太尉郭謹爲邠州節度使以前鎮州留後檢校太
傅白再榮爲滑州節度使加檢校太尉以陝州節度使
檢校太尉同平章事趙暉爲鳳翔節度使以前河中節
度使檢校太尉同平章事白文珂爲陝州節度使殿監
任延浩配流鄜州坐爲劉崇所奏故也丙子鄧州節度
使劉重進相州節度使王繼弘安州節度使楊信並自
檢校太傅加檢校太尉以鎮州留後兼幽州一行馬步
軍都部署檢校太傅劉在明爲鎮州節度使加檢校太
師部署如故貝州節度使檢校太傅李殷加檢校太尉

定州節度使檢校太尉孫方簡府州節度使檢校太傅
折從阮並加檢校太師丁丑中書侍郎兼戶部尙書平
章事李濤罷免勒歸私第時蘇逢吉等在中書樞密使
楊邠副樞密使郭威等權勢甚盛中書每有除授多爲
邠等所抑濤不平之因上疏請出邠等以藩鎮授之樞
密之務宜委逢吉禹珪疏入邠等知之乃見太后泣訴
其事太后怒濤由是獲譴先是中書厨釜鳴者數四未
幾濤罷免西道諸州奏河中李守貞謀叛發兵據潼關
夏四月辛巳陝州兵馬監押王玉奏收復潼關定州孫
方簡奏三月二十七日契丹棄定州遁去壬午以樞密

使楊邠爲中書侍郎兼吏部尙書平章事使如故以副
樞密使郭威爲樞密加檢校太尉三司使王章加檢校
太尉同平章事郢州刺史尹寶奏荆南起兵在境上欲
攻城是日以澶州節度使郭從義爲永興軍一行兵馬
都部署時供奉官時知化王益自鳳翔部署前永興節
度使趙贊部下牙兵趙思綰等三百餘人赴闕三月二
十四日行次永興思綰等作亂突入府城據城以叛故
命從義帥師以討之

案歐陽史云四月壬午永興軍將趙思綰叛附于李守貞案薛史趙

思綰據城自在三月非四月事又思綰先據城叛後附于李守貞歐陽史先書李守貞反後書思綰叛亦誤也

通鑑從薛史

甲申王景崇奏趙思綰叛見起兵攻討丁亥幸

道宮佛寺禱雨戊子東南面兵馬都元帥兩浙節度使
檢校太師兼中書令吳越國王錢弘俶加諸道兵馬都
元帥天策上將軍湖南節度使檢校太師兼中書令楚
王馬希廣加守中書令以陝州節度使白文珂爲河中
府城下一行都部署庚寅宰臣竇貞固蘇逢吉蘇禹珪
並進封開國公辛卯削奪李守貞在身官爵甲午以翰
林學士承旨戶部侍郎王仁裕爲戶部尙書以翰林學
士左散騎常侍張沆爲工部尙書以翰林學士中書舍
人范質爲戶部侍郎以樞密直學士尙書比部員外郎
王度爲祠部郎中並依前充職以侍衛步軍都指揮使

尙洪遷充西南面行營都虞候以客省使王峻爲西南面行營兵馬都監戊戌以宣徽南院使扈彥珂爲左金吾上將軍庚子以左金吾大將軍充兩街使檢校太傅劉承贊爲徐州節度使甲辰以宣徽北院使薛可言爲右金吾大將軍以皇城使李暉爲宣徽南院使乙巳定州節度使孫方簡奏復入于本州初方簡爲狼山寨主叛晉歸契丹及契丹降中渡之師乃以方簡爲定州節度使契丹主死永康王嗣位卽以蕃將耶律忠代之移方簡爲雲州節度使方簡不受命遂歸狼山高祖至闕方簡歸款復以中山命之是歲三月二十七日契丹棄

定州隳城壁焚室廬盡驅人民入蕃惟餘空城瓦礫而
已至是方簡自狼山回保定州是月河決原武縣河北
諸州旱徐州餓死民九百三十有七五月己酉朔國子
監奏周禮儀禮公羊穀梁四經未有印板欲集學官考
校雕造從之己未回鶻遣使朝貢丁卯前翰林學士徐
台符自幽州逃歸乙亥河決滑州魚池六月戊寅朔日
有食之庚辰以內客省使王峻爲宣徽北院使依前永
興城下兵馬都監以冀州牢城指揮使張廷翰爲冀州
刺史時廷翰殺本州刺史何行通自知州事故有是命
甲申以皇弟右衛大將軍承勳爲興元節度使檢校太

尉同平章事豐州節度使郭勳加檢校太師辛卯永興
兵馬都部署郭從義奏得王景崇報有兵自隴州來欲
投河中追襲至鄜城荆南節度使高從誨上表歸命從
誨嘗拒朝命至是方遣牙將劉扶詣闕請罪丙申鎮州
奏節度使劉在明卒戊戌以河陽節度使武行德爲鎮
州節度使以宣徽南院使李暉爲河陽節度使以相州
節度使王繼弘爲貝州節度使壬寅荆南高從誨貢奉
謝恩釋罪丙午以前永興軍節度使王守恩爲西京留
守是月河北旱青州蝗秋七月戊申朔相州節度使王
繼弘殺節度判官張易以訛言聞是時法尙深刻藩郡

凡奏刑殺不究其實卽順其請故當時從事鮮賓客之
禮重足累跡而事之猶不能免其禍焉壬子以工部侍
郎李穀充西南面行營都轉運使乙卯禮儀使張昭上
高祖廟尊號獻舞名并歌辭舞曲請以觀德爲名歌辭
不錄丙辰以久旱幸道宮佛寺禱雨是日大澍開封府
言陽武雍丘襄邑三縣蝗爲鸛鵒聚食詔禁捕鸛鵒庚
申樞密使郭威加同平章事辛酉滄州上言自今年七
月後幽州界投來人口凡五千一百四十七北土飢故
也乙丑以宣徽北院使王峻爲宣徽南院使以內客省
使吳虔裕爲宣徽北院使戊辰以遂州節度使兼侍衛

親軍馬軍都指揮使李洪信爲澶州節度使以澶州節度使郭從義爲永興軍節度使兼行營都部署庚午故兵部尙書李懌贈尙書左僕射鎮州奏準詔處斬節度副使張鵬訖鵬以一言之失爲鄴帥高行周所奏故命誅之乙亥新授鳳翔節度使趙暉奏與八作使王繼濤領部下兵同赴鳳翔時王景崇拒命故也八月己卯以華州節度使侯章爲邠州節度使以左金吾上將軍扈彥珂爲華州節度使壬午命樞密使郭威赴河中府軍前詔河中府永興鳳翔行營諸軍一稟威節制時李守貞王景崇趙思綰連衡作叛朝廷雖命白文珂常思攻

討河中物議以二帥非守貞之敵中外憂之及是命之

降人情大愜

案通鑑云自河東永興鳳翔三鎮拒命以來朝廷繼遣諸將討之昭義節度使常思

屯潼關白文珂屯同州趙暉屯咸陽惟郭崇義王峻置柵近長安而二人相惡如水火自春徂秋皆相持莫肯攻戰帝患之欲遣重臣臨督壬午以郭威爲軍前招慰安撫使諸軍皆受威節度與薛史所載詳畧互異

已以奉國左廂都指揮使閬州防禦使劉詞爲夔州節度使充侍衛步軍都指揮使兼河中行營都虞候以護聖左廂都指揮使岳州防禦使李洪義爲遂州節度使充侍衛馬軍都指揮使乙未兩浙節度使檢校太尉兼侍中吳越國王錢弘俶加檢校太師兼中書令東南面兵馬都元帥弘俶故吳越王元瓘之子也先是其兄弘

侖襲父位尋爲部下所廢以弘俶代之故特加是命焉
新授鳳翔節度使趙暉奏部署兵士赴鳳翔城下癸卯
郭威奏今月二十三日大軍已抵河府賊城至二十六
日開長連塹畢築長連城次九月戊申侯益部曲王守
筠自鳳翔來奔言益家屬盡爲王景崇所害壬子郭威
奏破河府賊軍于城下甲寅故夔州節度使兼侍衛步
軍都指揮使尙洪遷贈太尉乙丑雪書不時也戊辰鳳
翔都部署趙暉奏大破川軍于大散關殺三千餘人其
餘棄甲而遁隆平集藥元福從趙暉進討兵眾寡數倍他將皆爲卻元福擁數百騎獨出合日敢
回頭者斬眾効死以戰遂有成功王申郭威奏得郭崇義報今月十四

日鳳翔王景崇兵士離本城尋遣監軍李彥從率兵襲至法門寺西殺戮二千餘人詔升河中府解縣爲解州冬十月丙子朔山陵使竇貞固上太行皇帝陵名曰睿陵從之丁丑夕歲星入太微戊寅趙暉奏破王景崇賊軍于鳳翔城下甲申吐蕃遣使獻方物丙戌右羽林軍張播停任坐檢田受請託也丁亥中書舍人張誼責授房州司戶兵部郎中馬承翰責授慶州司戶並員外置所在馳驛發遣先是誼與承翰俱銜命于兩浙覩其驕僭之失形于譏誚兼乘醉有輕肆之言錢弘俶恥之撫其過以奏之朝廷以方務懷柔故有是命甲辰延州奏

夏州李彝殷先出兵臨州境欲應接李守貞今却抽退十一月甲寅誅太子太傅李崧及其弟司封員外郎嶼國子博士義夷其族爲部曲誣告故也詔曰稔惡圖危難逃天網虧忠負義必速神誅李崧頃在前朝最居重位略無裨益遂至滅亡及事契丹又爲親密士民俱憤險佞可知先皇帝含垢掩瑕推恩念舊擢居一品俾列三師不謂潛有苞藏謀危社稷散差人使潛結奸兇俯近山陵擬爲叛亂按其所告咸已伏辜宜正典章用懲奸逆其李崧李嶼李義一家骨肉及同謀作亂人並從極法云庚申大行皇帝靈駕進發辛酉荆南奏節度使

高從誨卒壬申葬高祖皇帝于睿陵十二月丁丑荆南節度使檢校太傅行峽州刺史高保融起復授荆南節度使檢校太尉同平章事渤海郡侯壬午帝被袞冕御崇元殿授六廟寶冊正使宰臣蘇禹珪及副使大府卿劉皞赴西京行禮兗州奏淮賊先于沂州界立柵前月十七日己歸海州爲李守貞牽制也

南唐書嗣主六年李守貞遣從事朱

元李平奉表來乞師以潤州李金全爲西面行營招撫使壽州劉彥貞爲副諫議大夫查文徽爲監軍使兵部侍郎魏岑爲沿淮巡撫使聞河中平遽班師又李金全傳云出師沐陽諸將銳于進取金全獨以爲遠不相及乃

止庚寅奉高祖神主于西京太廟淮南僞主李璟奉書于帝云先因河府李守貞求援又聞大國沿淮屯軍當

國亦于境上防備昨聞大朝收軍當國尋已徹備其商旅請依舊日通行朝廷不報辛卯羣臣上表請以三月九日誕聖日爲嘉慶節從之延州節度使高允權奏得都頭李彥李遇等告太子太師致仕劉景巖與鄉軍指揮使高志結集草寇欲取臘辰窺圖州城尋請使臣與指揮使李勳聊將兵士巡檢偵邏劉景巖果出兵鬪敵時卽殺敗其劉景巖尋獲斬之詔曰劉景巖年已衰暮身處退閒曾無止足之心輒肆包藏之毒結集徒黨窺伺藩垣所賴上將輸忠三軍協力盡除醜類克殄渠魁其劉景巖次男前德州刺史行琮已行極法長男渭州

舊五代史卷一百一
刺史行謙孫男邢州馬軍指揮使崇勳特放是冬多昏

霧日晏方解

永樂大典卷一
萬六千二百二

舊五代史卷一百一終

舊五代史卷一百一攷證

八月壬午命樞密使郭威赴河中府軍前 案是書周
太祖紀云七月西面師徒大集未果進取其月十三
日制授帝同平章事卽遣西征據此紀則周太祖以
七月庚申加同平章事八月壬午命赴河中府軍前
非一時事也二紀前後自相矛盾歐陽史漢周本紀
亦各仍是書之舊未能參攷畫一通鑑定從是書漢
紀

舊五代史卷一百一攷證

舊五代史卷一百二

宋司空同中書門下平章事薛居正等撰

隱帝紀中

漢書四

乾祐二年春正月乙巳朔制曰朕以眇躬獲纘洪緒念
守器承祧之重懷臨深履薄之憂屬以天道猶艱王室
多故天降重戾國有大喪奸臣樂禍以圖危羣寇幸灾
而伺隙力役未息兵革方殷朕所以嘗膽履冰廢殮輟
寐雖居億兆之上不以九五爲尊漸冀承平永安遐邇
內則稟太后之慈訓外則仗多士之忠勳股肱叶謀爪
牙宣力西摧三叛撫其背而扼其喉北挫諸蕃斷其臂

而折其脊次則巴邛嘯聚淮海猖狂纔聞矢接鋒交已
見山摧岸沮寇難少息師徒無虧兼以修奉園陵崇建
宗廟右賢左戚同寅協恭多事之中大禮無闕負荷斯
重哀感良深今以三陽布和四序更始宜申兌澤允荅
天休卹獄緩刑赦過宥罪當萬物之孳甲開三面之網
羅順彼發生以召和氣應乾祐二年正月一日昧爽已
前天下見禁罪人除十惡五逆官典犯職合造毒藥劫
家殺人正身外其餘並放河府李守貞鳳翔王景崇永
興趙思綰等比與國家素無讎釁偶因疑懼遂至叛違
然以彼之生靈朕之赤子久陷孤壘可念非辜易子析

骸填溝委壑爲人父母寧不軫傷但以屈已愛人先王
厚德包垢含辱列聖美談宜推濟物之恩用廣好生之
道其李守貞等宜令逐處都部署分明曉諭若能翻然
歸順朕卽待之如初當保始終享其富貴明申信誓固
無改移其或不順推誠堅欲拒命便可應時攻擊尅日
盪平候收復城池罪止元惡其餘誅誤一切不問重念
征討已來勞役滋甚兵猶在野民未息肩急賦繁徵財
殫力匱矜恤之澤未被于疲羸愁歎之聲幾盈于道路
卽俟邊鋒少弭國難漸除當議優饒冀獲蘇息諸道蕃
侯郡守等咸分寄在共體憂勞更宜念彼瘡痍倍加勤

卹究鄉閭之疾苦去州縣之煩苛勸課耕桑省察冤濫
共恢庶政用副憂勞凡百臣寮當體朕意壬子賜前昭
義軍節度使張從恩衣一襲金帶鞍馬綵帛等時有投
無名文字誣告從恩者故特有是賜以安其心乙卯河
府軍前奏今月四日夜賊軍偷斫河西寨捕斬七百餘
級時蜀軍自大散關來援王景崇郭威自將兵赴岐下
將行戒白文珂劉詞等曰賊之驍勇並在城西慎爲儆
備旣行至華州聞川軍散退且憂文珂等爲賊奔突遂
兼程而廻賊城內偵知郭威西行于正月四日夜遣賊
將王三鐵等

案通鑑作王繼勳宋史王繼勳傳繼勳武
勇在軍常用鐵鞭鐵槌軍中目爲王

鐵^三率驍勇千餘人沿流南行坎岸而登爲三道來攻賊

軍已入王師砦中劉詞極力拒之短兵旣接遂敗之二
月丙子詔諸道州府所征乾祐元年夏秋苗畝上紐征
白米稗草已納外並放是日旦黑霧四塞丁丑夕大風
乙酉以前房州刺史李筠夫爲鴻臚卿戊子前右監門
將軍喬達及其兄契丹僞命客省使榮等皆棄市達李
守貞之妹壻也故皆誅之庚寅徐州巡檢使成德欽奏
至峒嵒鎮遇淮賊破之殺五百人生擒一百二十人戊
戌大雨霖庚子詔左諫議大夫賈緯等修撰高祖實錄
三月丙辰以北京衙內指揮使劉鈞爲汾州防禦使夏

四月丙子以荆南節度行軍司馬武泰軍節度留後王保義爲檢校太尉領武泰軍節度使行軍如故丁丑潁州獻紫兔白兔是月幽定滄貝深冀等州地震辛巳太白經天辛丑幸道宮禱雨五月甲辰朔故湖南節度使檢校太尉兼中書令扶風郡公贈太師馬希聲追封衡陽王戊申以前邠州節度使安審約爲左神武統軍以前洛京副留守袁義爲右神武統軍乙卯河府軍前奏今月九日河中節度副使周光遜棄賊河西寨與將士一千一百三十人來奔己未右監門大將軍許遷上言奉使至博州博平縣界觀蠅生彌亘數里一夕並化爲

蝶飛去辛酉兗鄆齊三州奏蠧生乙丑永興趙思綰遣
牙將劉成詣闕乞降制授趙思綰華州節度留後檢校
太保以永興城內都指揮使常彥卿爲虢州刺史丁卯
宋州奏蝗抱草而死己巳湖南奏蠻寇賀州遣大將軍
徐進率兵援之戰于風陽山下大敗蠻獠斬首五千級
六月癸酉朔日有食之兗州奏捕蝗二萬斛魏博宿三
州蝗抱草而死乙亥潁州獻白鹿戊寅安州節度使楊
信奏亡父光遠蒙賜神道碑鐫勒畢無故中斷詔別令
斲石鐫勒己卯滑濮澶曹兗淄青齊宿懷相衛博陳等
州奏蝗分命中使致祭于所在川澤山林之神開封府

滑曹等州蝗甚遣使捕之

宋史段思恭傳隱帝蝗詔徧祈山川思恭上言赦過宥罪

議獄緩刑苟獄訟平允則災害不生望令諸州速決重刑無致淹濫必召和平從之

壬午月犯心

星辛卯回鶻遣使貢方物丙申改商州乾元縣爲乾祐

縣隸京兆府是月邠寧澤潞涇延鄜坊晉絳等州旱秋

七月辛亥湖南奏析長沙縣東界爲龍喜縣從之丙辰

樞密使郭威奏收復河府羅城李守貞退保子城丁巳

永興都部署郭從義奏新除華州留後趙思綰自今月

三日授華州留後準詔赴任三移行期仍要鎧甲以給

牙兵及與之竟不遵路至九日夕有部曲曹彥進告思

綰欲于十一日夜與同惡五百人奔南山入蜀是日詰

旦再促上路云俟夜進途臣尋與王峻入城分兵守四門其趙思綰部下軍各已執帶遂至牙署令趙思綰至則執之與一行徒黨並處置訖甲子樞密使郭威奏收復河中府逆賊李守貞自燔而死丙寅以權涼州留後折逋嘉施爲河西軍節度留後兗州奏捕蝗三萬斛丁卯前洺州團練使武漢球卒戊辰永興軍節度使兼兵馬都部署郭從義加同平章事以華州節度使郭從義奏處斬前巡檢喬守溫供奉官王益時知化任繼勳等守溫受高祖命巡檢京兆會王益時自鳳翔押送趙思綰等赴闕行至京兆守溫迎益于郊外思綰等突然作

亂遂據其城及郭從義率兵攻討令守溫部署役夫守溫有愛姬陷在賊城爲思綰所錄及收城從義盡得思綰之婢僕守溫求其愛姬從義雖與之意有所嫌遂發前罪密啟于郭威請除之與王益等併誅焉兗州奏捕蝗四萬斛壬午西京留臺侍御史趙礪彈奏太子太保王延太子洗馬張季凝等自去年五月後來每稱請假俱是不任拜起詔延等宜以本官致仕甲申以陝州節度使充河中一行兵馬都部署白文珂爲西京留守加兼侍中潞州節度使充河中一行副都部署常思加檢校太師以右散騎常侍盧撰爲戶部侍郎致仕辛卯右

拾遺高守瓊上言仕官年未三十請不除授縣令詔起
今後諸色選人年及七十者宜注優散官年少未歷資
考者不得注擬縣令癸巳以翰林學士工部尙書張沆
爲禮部尙書沆卜葬先人以內署無例乞假乃上章請
解職以赴葬事遂落職以遣之乙未宣徽南院使永興
行營兵馬都監王峻宣徽北院使河府行營兵馬都監
吳虔裕並加檢校太傅九月乙巳樞密使郭威檢校太
師兼侍中宋州節度使兼侍衛親軍都指揮使史弘肇
加兼中書令初郭威平河中回朝廷議加恩威奏曰臣
出兵已來輦轂之下無犬吠之憂俾臣得專一其事軍

旅所聚貲糧不乏此皆居中大臣鎮撫謀畫之功也臣
安敢獨擅其美乎帝然之于是弘肇與宰相樞密使三
司使次第加恩旣而諸大臣以恩之所被皆朝廷親近
之臣而宗室劉信及青州劉銖等皆國家元勳必有不
平之意且外慮諸侯以朝廷有私于親近也于是議及
四方侯伯普加恩焉丙午西京留守判官時彥澄推官
姜蟾少尹崔淑並免居官坐不隨府罷職爲留臺侍御
史趙礪所彈也已酉以右千牛上將軍孫漢贇爲絳州
刺史禮部尙書判吏部尙書銓事王松停見任坐子仁
寶爲李守貞從事也尋卒于其第辛亥宰臣寶貞固加

守司徒蘇逢吉加守司空蘇禹珪加左僕射楊邠加右
僕射依前兼樞密使太子太師致仕皇甫立卒癸丑三
司使王章加邑封乙卯鄴都高行周加守太師襄州安
審琦加守太傅兗州符彥卿加守太保北京劉崇加兼
中書令丁巳澶州李洪信移鎮陝州以侍衛馬軍都指
揮使遂州節度使李洪義爲澶州節度使己未許州劉
信加兼侍中開封尹侯益進封魯國公鄆州慕容彥超
青州劉銖並加兼侍中湖南馬希廣奏于八月十八日
大破朗州馬希萼之眾辛酉靈州馮暉夏州李彝殷並
加兼中書令右武衛將軍石懿左武衛將軍石訓並停

任懿等以八月中秋享晉五廟命娼婦宿于齋宮鴻臚寺劾之故有是責癸亥鎮州武行德鳳翔趙暉並加檢校太師鄴都磁相邢洺等奏霖雨害稼西京奏洛水溢岸乙丑晉州王晏同州張彥贇邠州侯章涇州史懿滄州王景延州王允權並加檢校太師冬十月庚午朔契丹入寇是日定州孫方簡徐州劉贇並加同平章事以利州節度使宋延渥爲滑州節度使甲戌皇弟興元節度使承勳加檢校太師丙子相州郭謹貝州王繼弘邢州薛懷讓並加檢校太尉庚辰安州楊信鄧州劉重進加檢校太師河陽李暉加檢校太傅壬午兩浙錢弘俶

加守尙書令湖南馬希廣加守太尉癸未監修國史蘇
逢吉史官賈緯以所撰高祖實錄二十卷上之丙戌荆
南高保融加檢校太師兼侍中以殿前都部署江州防
禦使李建爲遂州節度使充侍衛馬軍都指揮使以奉
國左廂都指揮使永州防禦使王殷爲夔州節度使充
侍衛步軍都指揮使契丹陷貝州高老鎮南至鄴都北
境又西北至南宮堂陽殺掠吏民數州之地大被其苦
藩郡守將閉關自固遣樞密使郭威率師巡邊仍令宣
徽使王峻參預軍事庚寅府州折從阮進封岐國公豐
州郭勳進封虢國公十一月壬寅鄜州留後王饒加檢

校太傅癸丑以吳越國王錢弘俶母吳氏爲順德太夫人時議者曰封贈之制婦人有國邑之號死乃有諡后妃公主亦然唐則天主女自我作古乃生有則天之號韋庶人有順聖之號知禮者非之近代梁氏賜張宗奭妻號曰賢懿又改爲莊惠今以吳氏爲順德皆非古之道也乙卯以大府卿劉皞爲宗正卿十二月庚午朔湖南奏靜江軍節度使馬希瞻以今年十月十八日卒廢朝二日辛未日暈三重戊寅司徒門下侍郎平章事竇貞固奏請修晉朝實錄詔史官賈緯竇儼王仲等修撰以禮部尙書張沆復爲翰林學士壬午皇帝二十一姊

永寧公主進封秦國長公主潁州奏破淮賊于安陽

永樂

大典卷一萬
六千二百二

舊五代史卷一百二終

舊五代史卷一百二攷證

漢隱帝紀中安州節度使楊信 案楊信本名承信在

隱帝時避御名去承字是書仍當時實錄之舊

丁巳永興都部署郭從義奏新除華州留後趙思綰與
一行徒黨並處置訖 案歐陽史作郭威殺華州留
後趙思綰于京兆蓋威命從義圖之耳

甲子樞密使郭威奏收復河中府逆賊李守貞自燔而
死 案通鑑壬戌李守貞自焚死歐陽史作甲子克
河中祇以奏聞之日爲據也五代春秋繫于六月殊
誤

舊五代史卷一百二 攷證
辛亥宰臣竇貞固加守司徒 案宋史竇貞固傳作隱
帝卽位加司徒攷貞固加司徒在乾祐二年宋史作
卽位所加蓋未詳攷

以利州節度使宋延渥爲滑州節度使 案延渥爲利
州節度使于前未見王禹偁宋公神道碑云少帝嗣
統授檢校太尉使持節利州諸軍事行利州刺史蓋
延渥于元年出鎮利州二年復改鎮也是書未及詳
載

舊五代史卷一百二攷證

舊五代史卷一百三

宋司空同中書門下平章事薛居正等撰

隱帝紀下

漢書五

乾祐三年春正月己亥朔帝不受朝賀鳳翔行營都部署趙暉奏前月二十四日收復鳳翔逆賊王景崇舉族

自燔而死

案歐陽史作正月西南行營都部署趙暉克鳳翔據薛史則收復鳳翔自在二年十二月

非三年春事也歐陽史蓋誤以告捷之月爲收復之月耳五代春秋作十二月趙暉克鳳翔誅王景崇爲得實

丁未鳳翔節度使充西南行營都部署趙暉加兼侍中

戊申密州刺史王萬敢奏奉詔領兵入海州界至荻水

鎮俘掠焚蕩更請益兵詔前沂州刺史郭瓊率禁軍赴

之庚戌前永興軍節度副使安友規除名流登州沙門
島先是友規權知永興軍府事及趙思綰之奔衝友規
失守城池至是乃正其罪焉癸亥以前邠州節度使宋
彥筠爲太子太師致仕丙辰分命使臣赴永興鳳翔河
中收葬用兵已來所在骸骨時已有僧聚髑髏二十萬
矣前沂州刺史郭瓊奏部署兵士深入海州賊界是月
有狐登明德樓主者獲之狐毛長而腹下別有二足二
月辛巳青州奏郭瓊部署兵士自海州廻至當道甲申
樞密使郭威巡邊廻丁亥汝州防禦使劉審交卒乙未
以前安州節度使劉遂凝爲左武衛上將軍以鄜州節

度使焦繼勳爲右武衛上將軍以前永興軍節度使趙
贊爲左驍衛上將軍三月己亥徐州部送所獲淮南都
將李暉等三十三人徇于市給衫帽放還本土是月鄴
都留守高行周兗州符彥卿鄆州慕容彥超西京留守
白文珂鎮州武行德安州楊信潞州常思府州折從阮
皆自鎮來朝嘉慶節故也戊午宴羣臣于永福殿帝初
舉樂壬戌鄴都高行周移鎮鄆州兗州符彥卿移鎮青
州並加邑封甲子西京留守白文珂潞州常思鎮州武
行德並進邑封鄆州慕容彥超移鎮兗州夏四月戊辰
朔邢州薛懷讓移鎮同州相州郭謹河陽李暉並進邑

封庚午府州折從阮移鎮鄧州辛未故深州刺史史萬

山

案遼史世宗紀殺深州刺史史萬山在天祿三年卽漢乾祐二年

贈太傅先是契丹

入邊萬山城守郭威遣索萬進率騎七百屯深州一日

契丹數千騎迫州東門萬山父子率兵百餘人襲之僞
退十餘里而伏兵發萬山血戰急請救于萬進萬進勒
兵不出萬山死之契丹亦解去時論以萬進爲罪故加
萬山贈典焉壬申華州劉詞移鎮邢州安州楊信移鎮
鄜州貝州王令溫移鎮安州並加邑封以鄜州留後王
饒爲華州節度使以其來朝故也丁丑尙食奉御王紹
隱除名流沙門島坐匿軍營女口也辛巳以宣徽北院

使吳虔裕爲鄭州防禦使時樞密使楊邠上章乞解樞
機帝命中使諭之曰樞機之職捨卿用誰忽有此章莫
有人離間否虔裕在傍颺言曰樞密重地難以久處俾
後來者迭居相公辭讓是也中使還具奏帝不悅故有
是命壬午以樞密使郭威鄴都留守依前樞密使詔河
北諸州應兵甲錢帛糧草一稟郭威處分癸未府州永
安軍額宜停命降爲團練州戊子翰林學士承旨戶部
尙書王仁裕罷職守兵部尙書左千牛上將軍張瓏卒
庚寅以西南面水陸轉運使尙書工部侍郎李穀爲陳
州刺史左金吾上將軍致仕馬萬卒甲午以前華州節

度使安審信爲左衛上將軍以前潞州節度使張從恩
爲右衛上將軍五月戊戌朔帝御崇元殿受朝丙午以
皇弟興元節度使承勳爲開封尹加兼中書令未出閣
甲子詔諸道州府差置散從官大府五百人上州三百
人下州二百人勒本處團集管係立節級檢校教習以
警備州城閏月癸巳京師大風雨壞營舍吹鄭門扉起
十數步而墮拔大木數十震死者六七十人水平地尺餘
池隍皆溢是月宮中有怪物投瓦石擊窗撼扉人不能
制六月庚子以國子祭酒田敏爲尙書右丞癸卯太僕
卿致仕謝攀卒輟視朝一日鄭州奏河決原武縣界乙

卯司天臺上言鎮星逆行至太微左掖門外自戊申年八月十二日入太微西垣犯上將屏星執法勾已往來至己酉年十一月十二日夜方出左掖門順行自今年正月十日夜復逆行入東垣至左掖門秋七月庚午河陽奏河漲三丈五尺乙亥滄州奏積雨約一丈二尺安州奏溝河泛溢州城內水深七尺丙子帝御崇元殿授皇太后冊命宰臣蘇逢吉行禮辛巳三司使奏州縣令錄佐官請據戶籍多少量定俸戶縣三千戶已上令月十千主簿八千二千戶已上令月八千主簿五千二千戶以下令月六千主簿四千每戶月出錢五百並以管

內中等戶充錄事參軍判司俸錢視州界令佐取其多者給之其俸戶與免縣司差役從之八月辛亥以蒙州城隍神爲靈感王從湖南請也時海賊攻州城州人禱于神城得不陷故有是請辛酉給事中陶穀上言請停五日內殿轉對從之壬戌以兵部侍郎于德辰爲御史中丞邊蔚爲兵部侍郎九月辛巳朗州節度司馬希萼奏請于京師別置邸院不允是時希萼與其弟湖南節度使希廣方構閹牆之怨故有是請帝以湖南已有邸務不可更置由是不允仍命降詔和解焉冬十月己亥帝狩于近郊丙午湖南馬希廣遣使上章且言荆南淮

南廣南三道結構欲分割湖湘乞聊發兵師以爲援助
時朝廷方議起軍會內難不果行丁未兩浙錢弘俶加
諸道兵馬元帥戊申彰德軍節度使郭謹卒癸丑以前
同州節度使張彥贇爲相州節度使辛酉月犯心大星
十一月甲子朔日有蝕之乙丑永州唐將軍祠贈太保
從湖南請也已巳日南至帝御崇元殿受朝賀仗衛如
式辛未詔侍衛步軍都指揮使王殷將兵屯澶州丙子
誅樞密使楊邠侍衛都指揮使史弘肇三司使王章夷
其族是日平旦甲士數十人由廣政殿出至東廡下害
邠等于閣內皆死于亂刃之下又誅弘肇弟小底軍都

虞候弘朗如京使甄彥奇內常侍辛從審楊邠子比部員外郎廷俛左衛將軍廷偉左贊善大夫廷倚王章姪右領衛將軍旻子堦戶部員外郎張昭肅樞密院副丞宣郭顥控鶴都虞候高進侍衛都承局荆南金三司都勾官柴訓等分兵收捕邠等家屬及部曲僉從盡戮之少頃樞密承旨聶文進急召宰臣百寮班于崇元殿庭宣楊邠史弘肇王章等同謀叛逆欲危宗社並斬之與卿等同慶班退召諸軍將校至萬歲殿帝親諭史弘肇等欲謀逆亂之狀且言弘肇等欺朕年幼專權擅命使汝輩常懷憂恐自此朕自與汝等爲主必無橫憂也諸

軍將校拜謝而退召前任節度使刺史統軍等上殿論之帝遣軍士守捉宮城諸門比近日盱朝臣步出宮門而去是日晴霽無雲而昏霧濛濛有如微雨人情惴恐日將午載楊邠等十餘尸分暴于南北市是日帝遣腹心賁密詔往澶州鄴都令澶州節度使李洪義誅侍衛步軍都指揮使王殷令鄴都屯駐護聖左廂都指揮使郭崇奉國左廂都指揮使曹英害樞密使郭威及宣徽使王峻急詔鄆州高行周青州符彥卿永興郭從義兗州慕容彥超同州薛懷讓鄭州吳虔裕陳州李穀等赴闕以宰臣蘇逢吉權知樞密院事前青州劉銖權知開封

府事侍衛馬軍都指揮使李洪建判侍衛司事內客省使閭晉卿權侍衛馬軍都指揮使丁丑澶州節度使李洪義受得密詔知事不克乃引使人見王殷殷與洪義遣本州副使陳光穗賁所受詔馳至鄴都宋史少帝遣供奉官孟業齎密詔令洪義殺王殷洪義素怯懦慮殷覺遷延不敢發遽引業見殷殷乃錮業送密詔于周祖郭威得之卽召王峻郭崇曹英及諸軍將校至牙署視詔兼告楊史諸公冤枉之狀且曰汝等當奉行詔旨斷予首以報天子自取功名郭崇等與諸將校前曰此事必非聖意卽是李業等竊發假如如此輩便握權柄國家安平事可陳論何須自棄致千載之下被此惡名崇等願從

公入朝面自洗雪于是將校等請威入朝以除君側之

惡共安天下

東都事略漢隱帝遣使害太祖魏仁浦曰公有大功于朝廷握強兵臨重鎮以讒見

疑豈可坐而待斃教以易其語云翌日郭威以眾南行
誅將士以激怒眾心太祖納其言

戊寅鄴兵至澶州庚辰至滑州節度使宋延渥開門迎

降

案歐陽史庚辰義成軍節度使宋延渥叛附于郭威與薛氏同通鑑作辛巳與薛史異

是日詔

前開封尹侯益前鄆州節度使張彥超權侍衛馬軍都

指揮使閻晉卿鄭州防禦使吳虔裕等率禁軍赴澶州

守捉辛巳帝之小豎驚脫自北迴先是帝遣驚脫偵鄴

軍所至爲游騎所獲郭威卽遣迴因令附奏赴闕之意

仍以密奏置驚脫衣領中帝覽奏卽召李業示之聶文

進郭允明在旁懼形于色初議車駕幸澶州及聞鄴兵
已至河上乃止帝大懼私謂宰臣竇貞固等曰昨來之
事太草草耳李業等請帝傾府庫以給諸軍宰相蘇禹
珪以爲未可業拜禹珪于帝前曰相公且爲官家莫惜
府庫遂下令侍衛軍人給二十緡下軍各給十緡其北
來將士亦準此仍遣北來將士在營子弟各賁家問向
北諭之王午鄴軍至封丘慕容彥超自鎮馳至帝遂以
軍旅之事委之宋史侯益傳云周太祖起兵隱帝議出
師禦之益獻計曰王者無敵于天下兵
不宜輕出况大名戍卒家屬盡在京城不如閉關以挫
其銳遣其母妻發降以招之可不戰而定慕容彥超以
爲益衰老作懦夫計沮之彥超謂帝曰陛下勿憂臣當生致其魁首

彥超退見聶文進詢北來兵數及將校名氏文進告之
彥超懼曰大是劇賊不宜輕耳又遣袁義劉重進王知
則等出師以繼前軍慕容彥超以大軍駐于七里郊掘
塹以自衛都下率坊市出酒食以餉軍癸未車駕勞軍
卽日還宮翌日慕容彥超揚言曰官家宮中無事明日
再出觀臣破賊甲申車駕復出幸七里店軍營王師陣
于劉子陂與鄴軍相望太后以帝至晚在外遣中使謂
聶文進曰賊軍在近大須用意文進曰有臣在必不失
策縱有一百箇郭威亦當生擒之耳彥超輕脫先擊北
軍郭威命何福進王彥超李筠等大合騎以乘之彥超

退却死者百餘人于是諸軍奪氣稍稍奔于北軍吳虔
裕張彥超等相繼而去慕容彥超以部下十數騎奔充
州是夜帝與宰臣從官宿于野次侯益焦繼勳潛奔鄴
軍乙酉旦帝策馬至玄化門劉銖在門上問帝左右兵
馬何在乃射左右帝迴與蘇逢吉郭允明詣西北村舍
郭允明知事不濟乃剗刃于帝而崩時年二十蘇逢吉
郭允明皆自殺案通鑑考異引劉恕曰允明帝所親信
何由弑逆蓋郭威兵殺帝事成之日諱
之因允明自殺而歸罪耳今考劉恕所辨祇以
揣度言之亦無實據薛史蓋據當時實錄也是日周
太祖自迎春門入諸軍大掠烟火四發翌日至哺方定
前滑州節度使白再榮爲亂兵所害吏部侍郎張允隆

屍而死周太祖旣入京城命有司遷帝梓宮于太平宮
或曰可依魏高貴鄉公故事以公禮葬之周祖曰予顛
沛之中不能護衛至尊以至于此若又貶降人謂我何
于是詔擇日舉哀命前宗正卿劉暉主喪丙戌太后詔
曰高祖皇帝翦亂除兇變家爲國救生靈于塗炭創王
業于艱難甫定寰區遽遺弓劒樞密使郭威楊邠侍衛
使史弘肇三司使王章親承顧命輔立少君協力同心
安邦定國旋屬四方多事三叛連衡吳蜀內侵契丹啟
釁蒸黎惱懼宗社阽危郭威受任專征提戈進討躬當
矢石盡掃烟塵外寇蕩平中原寧謐復以強敵未殄邊

塞多艱允賴寶臣往臨大鄴疆場有藩籬之固朝廷寬
宵旰之憂不謂兇豎連謀羣小得志密藏鋒刃竊發殿
庭已殺害其忠良方奏聞于少主無辜受戮有口稱冤
而又潛差使臣矯賞宣命謀害樞密使郭威宣徽使王
峻侍衛步軍都指揮使王殷等人知無罪天不助奸今
者郭威王峻澶州節度使李洪義前曹州防禦何福進
前復州防禦使王彥超前博州刺史李筠北面行營馬
步都指揮使郭崇步軍都指揮使曹英護聖都指揮使
白重贊索萬進田景咸樊愛能李萬全史彥超奉國都
指揮使張鐸王暉胡立弩手指揮使何贊等徑領兵師

來安社稷逆黨皇城使李業內客省使閭晉卿樞密都承旨聶文進飛龍使後贊翰林茶酒使郭允明等脅君于大內出戰于近郊及至力窮遂行弑逆冤憤之極今古未聞今則兇黨既除羣情共悅神器不可以無主萬機不可以久曠宜擇賢君以安天下河東節度使崇許州節度使信皆高祖之弟徐州節度使贇開封尹承勳高祖之男俱列磐維皆居屏翰宜令文武百辟議擇嗣君以承大統云樞密使郭威以蕭牆變起宗祏無奉率羣臣候太后請定所立且言開封尹承勳高祖皇帝之愛子也請立爲嗣太后告以承勳羸病日久不能自舉

周太祖與諸將請視承勳起居及視之方信遂議立高祖從子徐州節度使贊爲嗣乙丑太后誥曰天未悔禍喪亂孔多嗣主幼冲羣兇蔽惑構奸謀于造次縱毒蠱于斯須將相大臣連頸受戮股肱良佐無罪見屠行路咨嗟羣心扼腕則高祖之洪烈將墜于地賴大臣郭威等激揚忠義拯濟顛危除惡蔓以無遺俾綴旒之不絕宗祧事重續繼才難旣聞將相之謀復考蒼龜之兆天人協贊社稷是依徐州節度使贊稟上聖之資抱中和之德先皇如子鍾愛特深固可以子育兆民君臨萬國宜令所同擇日備法駕奉迎卽皇帝位於戲神器至重

天步方艱致理保邦不可以不敬貽謀聽政不可以不勤允執厥中祇膺景命是日遣前太師馮道等往徐奉迎周太祖以嗣君未至萬機不可暫曠率羣臣請太后臨朝詔答曰昨以奸邪構釁亂我邦家勲德効忠剪除兇慝俯從人欲已立嗣君宗社危而再安紀綱壞而復振皇帝法駕未至庶事方殷百辟上言請予蒞政宜允輿議權總萬機止于浹旬卽復明辟按前代故太上皇稱詒太皇太后皇太后曰令今云詒有司誣也以宣徽南院使王峻爲樞密使右神武統軍袁蟻爲宣徽南院使陳州刺史李穀權判三司步軍都指揮使王殷爲侍

衛親軍馬步都指揮使護聖左廂都指揮使郭崇爲侍

衛馬軍都指揮使奉國左廂都指揮使曹英爲侍衛步

軍都指揮使鎮州邢州馳奏契丹寇洺州陷內丘縣時

契丹永康王鄂約

舊作兀欲今改正

率部族兩道入邊內丘城

小而固契丹攻之五日不下敵人傷者甚眾時有官軍

五百在城防戍戍攻急官軍降于敵屠其城而去

案遼史世

宗紀十月自將南伐下安平內丘東鹿等城大獲而還與薛史所載互有詳畧

庚寅樞密使郭

威奏左軍巡勘得飛龍使後贊款伏與蘇逢吉李業閭

晉卿聶文進郭允明等同謀令散員都虞候賁德等下

手殺害史弘肇等權開封尹劉銖具伏朋附李業爲亂

屠害將相家屬其劉銖等準詔旨處置訖並蘇逢吉郭
允明閻晉卿聶文進首級並梟于南北市其骨肉放棄
辛卯河北諸州馳報契丹深入太后詔曰王室多故邊
境未寧內難雖平外寇仍熾據北面奏報強敵奔衝繼
發兵師未聞平殄須勞上將暫自臨戎宜令樞密使郭
威部署大軍早謀掩擊其軍國庶事權委宰臣竇貞固
蘇禹珪樞密使王峻等商量施行在京馬步兵士委王
殷都大提舉十二月甲午朔郭威領大軍北征丁酉以
翰林學士尙書戶部侍郎知制誥范質爲樞密副使都
事略周太祖征李守貞每朝廷遣使齎詔處分軍事皆
中機會太祖問誰爲此辭使者以范質對太祖曰宰相

器也太祖起兵入京師遽令草太后詔及議迎湘陝州部侍郎樞密副使陰公儀注乃白太后以質爲兵

李洪信奏馬步都指揮使聶召奉國指揮使楊德護聖指揮使康審澄等與節度使判官路濤掌書記張洞都押衙楊紹勅等同情謀叛並殺之惟康審澄夜中放火斬關奔歸京師初朝議以諸道方鎮皆是勳臣不諳政理其都押衙孔目令三司軍將內選才補之藩帥不悅故洪信因朝廷多故誣奏加害焉壬寅湖南上言朗州馬希萼引五谿蠻及淮南洪州軍來攻當道望量差兵士于淮境牽引乙巳遣前淄州刺史陳恩讓領軍入淮南界以便宜進取辛亥遣宰相蘇禹珪及朝臣十員往

宋州迎奉嗣君壬子樞密使郭威次澶州何福進已下
及諸軍將士扶擁威請爲天子卽日南還威上章于太
后言爲諸軍所迫班師庚申威至北郊駐軍于臯門村
許州巡檢前申州刺史馬鐸奏節度使劉信自殺壬戌
奉太后詔命樞密使侍中郭威監國中外庶事並取監
國處分先時樞密使王峻以湘陰公已在宋州慮聞澶
州之事左右變生遣侍衛馬軍指揮使郭崇率七百騎
往衛之東都事略郭崇傳王峻遣崇率七百騎迎贊遇
于睢陽崇曰澶州兵變遣崇來衛乘輿非有他也具言軍情有屬天命已定贊
執崇手而泣崇卽送贊就館已未太后詔曰比者樞
密使郭威志在社稷議立長君以徐州節度使贊高祖

近親立爲漢嗣爰自藩鎮徵赴京師雖詔命尋行而軍情不附天道在北人心靡東適當改卜之初俾膺分土之命贊可降授開府儀同三司檢校太師上柱國封湘陰公食邑三千戶食實封五百戶明年正月丁卯太后詔奉符寶于監國可卽皇帝位周太祖踐阼奏太后爲母遷于西宮上尊號曰昭聖太后是月十五日周太祖與百寮詣帝殯宮成服親奠不視朝七日又詔太常定諡曰隱以其年八月二日復遣前宗正卿劉皞護靈輶備儀仗葬于許州陽翟縣之潁陵祔神主于高祖之寢宮帝姿貌白皙眉目疏朗未卽位時目多爛擊唾洩不

止卽位之始遽無此態及內難將作復如故帝自關西
平定之後稍生驕易然畏憚大臣未至縱恣嘗因乾象
差忒宮中或有怪異召司天監趙延乂訊其休咎延乂
對以修德卽無患旣退遣中使就問延乂曰何者爲德
延乂勸讀貞觀政要邇後與聶文進郭允明後贊狎習
信其邪說以至于敗高祖之征鄴城也一日帝語太祖
曰我夜來夢爾爲驢背我升天旣捨爾俄變爲龍捨我
南去是何祥也周太祖撫掌而笑冥符胥蠶豈偶然哉

永樂大典卷一
萬六千二百二

史臣曰隱帝以尙幼之年嗣新造之業受命之主德非

禹湯輔政之臣復非伊呂將欲保延洪之運守不拔之
基固不可得也然西摧三叛雖僅滅于櫓槍而內稔羣
兇俄自取于狼狽自古覆宗絕祀之速者未有如帝之
甚也噫蓋人謀之弗臧非天命之遽奪也

永樂大典卷一萬六千二

舊五代史卷一百三終

舊五代史卷一百三攷證

漢隱帝紀下鳳翔行營都部署趙暉奏前月二十四日
收復鳳翔 案歐陽史作正月趙暉克鳳翔據是書
則收復鳳翔在二年十二月非三年春事也歐陽史
蓋誤以告捷之月爲收復之月耳五代春秋作十二
月收復鳳翔誅王景崇爲得其實

澶州刺史李洪義 案宋史洪義本名洪威避周太祖
諱改

護聖左廂都指揮使郭崇 案東都事略郭崇初名崇
威避周太祖諱止稱崇

舊五代史卷一百三 通鑑
已丑太后誥曰 案原本作乙丑與五代春秋同今從

通鑑改作已丑

舊五代史卷一百三攷證

舊五代史

一六

